

Copyright is owned by the Author of the thesis. Permission is given for a copy to be downloaded by an individual for the purpose of research and private study only. The thesis may not be reproduced elsewhere without the permission of the Author.

**TŪ MĀIA, TŪ PAKEKE, TŪ RANGATIRA
NGĀ KUIA, NGĀ MANA E PŪKAHA ANA:
KO TE MĀTAURANGA MĀORI**

**HE TUHINGA WHAKAPAE HEI WHAKAEA I NGĀ
WHĀINGA MŌ TE TOHU PAE TUARUA I ROTO I
TE WHARE WĀNANGA O MANAWATŪ – TE
KUNENGA KI PŪREHUROA.**

NĀ

PIRIHIRA HINGATU ORMSBY

2010

He Ihirangi Whakataunga

	Whārangi
He Ihirangi Whakataunga	1-2
He Mihi	3
He Maimai Aroha	4
He Kōrero Whakarāpopoto	5
Te Ūpoko Tuatahi	6
▪ 1.1 He kupu whakatuwheratanga	6-7
▪ 1.2 Te Kaupapa	7-9
▪ 1.3 Te Pūtake o te kaupapa	9-12
▪ 1.4 He Takiwa nō roto mai o Te Whānau-ā-Apanui	12-13
▪ 1.5 Te Whanau-ā-Apanui	13-14
▪ 1.6 Ngā Marae o Te Whānau-ā-Apanui	14-15
▪ 1.7 Hītori	15-18
▪ 1.8 Te Kura	18-19
▪ 1.9 Ngā Wawata	19-21
Te Ūpoko Tuarua	22
▪ 2.1 Ngā Āhua o te mahi kaupapa rangahau	22
▪ 2.2 Ngā Kuia Pakeke Māori	22-29
▪ 2.3 Ngā Ture	29-30
▪ 2.4 Ngā Pātai	30-32
▪ 2.5 He Taonga te Reo, Kia Mau	32-40
▪ 2.6 Te Whakakapi	40
Te Ūpoko Tuatoru	41
▪ 3.1 I pēhea koe i tīmata ai hei kura māhita?	41-50
▪ 3.2 He aha tēnei mea te Mātauranga Māori	51-62
Te Ūpoko Tuawhā	63
▪ 4.1 Ngā Akoranga o te kāinga	64-66
▪ 4.2 Ngā Akoranga i te kura	66-70
▪ 4.3 Ko rātau anō ngā kaiwhakaako	70-71
▪ 4.4 Ō rātau ake huanga motuhake	71-73
▪ 4.5 Kei whea mai te mana o te wahine	73-80

Te Ūpoko Tuarima	81
▪ 5.1 Te Ūpoko Tuatahi	81-82
▪ 5.2 Te Ūpoko Tuarua	82-84
▪ 5.3 Te Ūpoko Tuatoru	84
▪ 5.4 Te Ūpoko Tuawhā	85
▪ 5.5 Te Ūpoko Tuarima	85-86
He Kupu Hou	87-89
Ngā Kāhui Pukapuka	90-93

He Mihi

E ngā mana, e ngā reo, ngā rangatira, tēnei te mihi ki a kōutou i runga i ngā āhuatanga e pā ana ki tēnā, ki tēna o ngā whanau, ngā hapū, ngā iwi huri noa i te motu.

Ki te hunga kua ngaro atu ki te pō, kua kore e kitea ō rātau kanohi, kua kore e rangona ō rātau reo, e kore mātau e wareware ki a kōutou nō te mea nā rātau ngā kākano i rui mō te tini, mō te mano, hei rongoa whakaohoho i te hinengaro, hei whakaaraara i ngā whakaaro, hei whāngai anō hoki i te wairua. Mā mātau e takatū tonu nei, i runga i te mata o Papatūānuku e ngaki, e hauhake i ngā māra kia puāwai ngā hua, hei orange mō ngā uri whakaheke. Moe mai rā i te wāhi okiokinga mō te tangata. Ko rātau ngā mate ki a rātau. Ko mātau te hunga ora ki a mātau huri noa i te motu.

Tīhe! Mauri Ora.

Ki ngā kuia pakeke Māori, ngā pātaka tuku kōrero, a Te Rina Joe, a Hiro Grace, a Mere Clarke, a Awhina Waaka. Tēnei taku mihi ki a kōutou.

Ko kōutou ngā morehu e pūmau ana ki te pīkau i ngā tikanga o kui mā, o koro mā.

Nā kōutou i koha mai ngā pitopito kōrero. He kōrero i pā ai ki ō kōutou kāinga me te āhuatanga noho o ngā whanau, tae noa ki ngā urunga kura māhita.

I uhia mai e kōutou ngā manaakitanga katoa ki runga i ahau. Taku waimarie.

Nā reira ka mihi tōnu ki a kōutou katoa. Tēnā kōutou, tēnā kōutou, tēnā kōutou katoa.

Ki aku kaiwhakahaere, aku kaiarahi o Te Pūtahi-a-Toi, o Te Whare Wānanga o Papaioea. E Tai, nāhau i tīmata kia maunu tēnei waka o te kaupapa rangahau ki te mutunga. E Rangī nāhau i kukume kia hoea tika ngā tuhituhinga ki uta. Tēnei te mihi mahana ki a kōrua.

Ki tēnei o ngā kaitautoko a Whetu Tipiwai e hiki nei i taku wairua. Ki a Peti Kenrick mō te whakaaro ki te awahi mai i ahau. Ki taku whanaunga a Tiki Koroheke mō te whakatikatika mai i ngā rerenga kōrero. Ki a Hamiora Koroheke mō ngā kōrero e pā ana ki te whānau me ngā papakāinga. Ki a Luke Fitzsimons rāua ko Graeme Wilson mō ngā mahi whakatika rorohiko. Tēnei rā te mihi ki a kōutou katoa. Nō reira kāre he mutunga ki tēnei mea te mihi, ka rere tonu, ka rere tonu.

Tēnā kōutou, tēnā kōutou, tēnā kōutou katoa.

He Maimai Aroha

Tēnei rā te poroporoaki ki tōku kuia a Kite Atarangi Koroheke, i mate nei i te waru o ngā rā o Tīhema i te tau rua mano mā waru. He iwa tekau ōna pakeke.

Nan, kātahi te pōuritanga ka pā mai ki ahau.

Kāre i tutuki i ahau taku tuhinga whakapae ka tae mai he karere kua hinga te totara nui o te whanau. Pupuke wai ana ngā roimata i aku whatu e.

Heke turuturu ana te hūpe mō tōku kuia e.

Ko koe te poutokomanawa o te whanau.

I a koe e takoto ana i te mahau o Hine Mahuru, i Wairuru Marae, i kīa e ngā kaikōrero he morehu kuia koe. E tika ana tā rātau i kōrero ai.

Nō te mea, neke atu i te ono tekau mā waru tau koe e noho ana i Whainui.

I tangata whenua noa atu kētia koe i tēnei rohe o Te Whānau-ā-Apanui.

Nāhau i poipoi ngā whanau, ngā hapū me te iwi o Apanui ki ngā akoranga rangatira i runga i ngā marae. Ko te karanga tōu tohungatanga me āu kete whakairo.

Hoki atu koe ki te kōpū o Papatūānuku, heke iho ki a Hine-nui-te pō i ngā pō uriuri, ngā pō tangotango.

Tō rerenga wairua ki Awaroa, i manatū ai koe.

Kua mahue mai ko mātau ngā uri e tūtehua nei.

E hotu nei ko te manawa, mōu.

Takoto mai Nan, i tō moenga roa.

Kōutou mā ki a kōutou, ko mātau ngā mahuetanga ki a mātau

Hoki atu rā ki a rātau mā.

Haere, haere, haere atu rā.

He Kōrero Whakarāpopoto

He tika te kōrero a ō tātau tūpuna, ko te wahine te ūkaipō, ko te wahine te puna roimata, ko te wahine te puna kōrero, ko te wahine te puna mātauranga. Kei te wahine te mana ki te tuku i ngā kōrero me ngā taonga ki tēnā whakatipuranga, ki tēnā whakatipuranga e haere ake nei. Otira, i ēnei wā kua rerekē tēnei mea ko te mātauranga Māori. Kua hikina ngā whare wānanga tawhito me ngā wharemaire owhakupata, ā, kei raro tonu tātau i ngā whakahaere a te Pākehā. Ahakoa tēnei āhuatanga, ki au nei, kei ngā wāhine tonu tēnei taonga ko te mātauranga. Waimarie tātau te iwi Māori ki te manawanui o ngā pakeke o ngā kurumatarērehu, ki te noho ki ngā kura ki te ako i ngā tamariki. Kāore e tū atu i ngā kuia pakeke Māori mō ēnei mahi. Nā rātau te ringa māmā ki te poipoi, ki te awahi, ki te manaaki hoki i ngā taitamariki ki te whai i te mātauranga mai tōna takenga, ki te kōmata. Heoi, ko te pūtake o tēnei tuhinga roa, ko te whai i ngā kōrero a ngā kuia pakeke Māori kua roa nei e mahi ana i roto i te kaupapa mātauranga.

Kia mōhio pū tātau ki ngā take e here nei i ngā kuia ki ngā tamariki, ki ngā kura, ki te mātauranga hoki. Kia mōhio hoki tātau ki ngā pūmanawa kei ēnei kuia i roto i te kaupapa akoako. Kia mīharo tātau ki ō rātau māia, ki ō rātau kaha, ki ō rātau aroha ki ngā tamariki katoa e hiakai ana ki ngā purapura o te mātauranga.